

Proyecto piloto a cuminsa pa haci nos scolnan mas saludabel

ORANJESTAD – Mientras cu cinco scol preparatorio y basico ta fungiendo como scolnan piloto y otro scolnan tambe a cuminsa cun'e, un stuurgroep a cuminsa pa prepara un criterio pa haci scolnan mas saludabel.

ESILO DI BIDA SALUDABEL

Na comienso di e aña escolar nobo, e scolnan piloto a scoge nan tema, caminda cu na 2016 nan mester muestra en berdad cu cambianan a wordo haci. Pero por ehempel na Cacique Macuarima nan a traha masha duro mes y ya pa e aña aki nan lo por keda cla. Segun lider di e proyecto aki Scol saludabel, Sra. Miriam Baiz, e scol aki ta boga pa un estilo di bida mas saludabel, cu bon nutricion. Nan tabata tin tres punto di accion: Un maneho nobo di treat, bende snacksnan mas saludabel na scol y laga e muchanan bin cu cuminda mas saludabel.

A LARGO PLAZO

Esaki no ta un proyecto di algun siman, tampoco no ta un proyecto di cada klas, pero ta trata aki di un cambio di comportacion di henter e scol y nan lo bay logra esaki evidentemente e aña escolar aki, segun Baiz.

PRESION

Mon Plaisir Kleuter y Basisschool ta un otro scol piloto, caminda e docentenan a pone presion como un tema social emocional. E stuurgroep ta guia ambos scol, esta Cacique Macuarima y Mon Plaisir dor di pone nan den contacto cu instancianan cu por brinda nan ayudo.

Tin cu pensa riba Departamentonan di Salud y Asuntonan Social, como tambe Oficina Central di Estadistica. Pasobra e presion mester muestra cla, pa asina e scol por midi si e presion por disminui. E stuurgroep ta na disposicion di e scolnan si nan mester yuda si en caso por papia di un presion.

MAS SCOL CU INICIATIVA

Mientras cu otro scolnan piloto, manera Paulus School y Kudawecha, ta trahando riba nan propio tema, e stuurgroep lo evalua na final di e aña escolar con e prome aña di "Scol Saludabel" a cana. E grupo entre tanto mester formula e criterio, caminda e scol mester cumpli cun'e pa wordo yama un "Scol Saludabel". E sistema aki ya a wordo aplica na Hulanda, y awor lo purba esaki na Aruba pa asina nan ricibi un tipo di "vignet", un plachi, caminda

nan ta wordo yama como un "Scol Saludabel". Pero esey por wordo haci ora bo sa con e scolnan piloto den practica ta anda cu e tema y kico nan ta topa nan mes cun'e y si e bay bon.

UN PROYECTO POSITIVO

Positivo ta cu tin varios scol mas cu kier cuminsa cu e proyecto di "Scol Saludabel". Prinses Amalia y Pius X no ta scolnan piloto, pero nan tambe ta trahando cu e principio

pa ta un scol mas saludabel.

NADA PURA

E implementacion di e sistema aki mester sosode paso a paso y no pura. Esaki ta segun e lider di e proyecto, kende ta positivo riba e comienso di e proyecto di e aña aki. E implementacion mester sosode na un manera masha tranquil mes. Esey ta brinda mas oportunidad pa un bon resultado. E proyecto aki no a para keto, aunke cu tin cambio den ministro. Automati-

camente mester mira tambe con e cooperacion entre e grupo di maneho y e ministro nobo ta bay. Pero, manera cu Baiz mes di, tur ta sosode na su momento.

E grupo di maneho "Scol Saludabel" ta un iniciativa pa mehora den forma structural e scolnan riba salud, bienestar y seguridad y ta den man di Departamento di Enseñanza, Departamento di Salubridad Publico y Departamento di Asuntonan Social. □

